



Sesida dals

19 d'avust 2025

Communitgà ils

20 d'avust 2025

Protocol nr.

604/2025

Dumonda Berther

concernent lais d'accumulaziun pitschens en connex cun la finamira da la Regenza 8

Resposta da la Regenza

La Regenza parta dal fatg, che la dumonda na sa refereschia betg a la finamira da la Regenza 8, mabain a las finamiras da la Regenza 6 e 7. Dapi ils onns 1990 vegnan construids en il Grischun batschigls e puzs d'aua da stizzar fieu per cumbatter incendis da guaud. Quests batschigls e puzs han en media volumens d'accumulaziun dad 250 m³. Els servan exclusivamain a la finamira ed a l'intent da segirar directamain la disponibladad d'aua en cas d'in eveniment. Ils lieus vegn tschernids sin basa da las ristgas. Quai vul dir: batschigls d'aua da stizzar fieu vegnan construids cunzunt là, nua ch'i n'ha nagina u memia pouca aua. En las regiuns turisticas èn vegnids construids en il decurs dals onns batschigls da retenziun per ennavar pistas da skis e loipas. Quels han volumens da 10 000 fin 400 000 m³. En il medem territori da skis pon els esser colliads in cun l'auter per gulivar il basegn d'aua u per producir energia. Batschigls da retenziun che han l'intent da metter a disposiziun aua da sauar u schizunt aua da baiver, na datti anc nagins en il chantun Grischun. Il motiv dastgassan esser ils gronds custs, cumpareglià cun la disponibladad d'auas currentas e da funtaunas d'aua sutterrana per la sauaziun. Per producir intenziunadamain ed exclusivamain electricitad u per accumular in surpli d'electricitad na vegnan lais d'accumulaziun pitschens actualmain betg utilisads. Ina tala utilisaziun multipla premetta, che l'intent sco tal, sco la retenziun d'aua da stizzar fieu u l'ennavada, na vegnia betg tangà u perfin impedì.

Tar la dumonda 1: Utilisaziuns dublas u multiplas datti gia oz. Il potenzial da lais d'accumulaziun pitschens multifunziunals dastgass esser plitgusch pitschen, perquai che las pretensiuns al lieu, a la disponibladad da temp ed a l'infrastructura necessaria èn memia differentas per l'utilisaziun multipla sco reservuar d'aua da stizzar fieu, d'aua da baiver u d'aua da diever u sco pitschen implant d'accumulaziun a pompa. Cumpareglià cun las grondas ovas d'accumulaziun a pompa po plinavant vegnir accumulada mo pouca energia en tals batschigls, uschia che la limita da la rentabilitad na vegn strusch cuntanschida.

Tar la dumonda 2: En il sector da l'adattaziun al clima èsi er impurtant da pudair metter a disposiziun aua per differents intents durant periodas da setgira pli lungas. Là n'èn batschigls averts cun quotas da perdita relativamain grondas betg l'emprima opziun, perquai ch'il terren resp. il corpus da l'aua sutterrana è il vair accumulatur d'aua da baiver e d'aua da diever. Er en la planisaziun d'energia n'èn lais d'accumulaziun pitschens nagin tema. L'interacziun tranter la fotovoltaica e las capacitads d'accumulaziun è bain fitg impurtanta per adattar il process da producziun al basegn d'energia. Cun battarias staziunaras u cun las grondas ovras d'accumulaziun a pompa datti dentant bler meglras opziuns.

Tar la dumonda 3: Ina promoziun sistematica da tals projects u da projects sumegliants na fiss betg giavischabla ord vista da la Regenza, perquai che lais d'accumulaziun pitschens na servan – tut tenor la gestiun – per regla betg a tut ils intents numnads en la dumonda e pudessan er chaschunar novs conflicts. Sin plaun naziunal na datti nagina promoziun da grondas ovras d'accumulaziun a pompa. L'Uffizi federal d'agricultura sa participescha dentant ad in project da resursas en ils chantuns Basilea-Champagna e Lucerna. En il rom da quest project vegni evaluà, tge potenzial che mesiras idrotecnicas, sco batschigls da retenziun, la rimnada d'aua da plievgia e.u.v., han per l'agricultura sco mesiras d'adattaziun al clima.

Tar la dumonda 4: Sa basond sin il concept «Prevenziun cunter incendis da guaud 2030» sustegna l'Uffizi da guaud e privels da la natira en l'entir chantun batschigls e puzs d'aua da stizzar fieu che correspundan als basegns e che sa basan sin las ristgas. In'utilisaziun supplementara da tals stabiliments per auters intents è esclusa, perquai ch'ins sto temair, che l'aua necessaria da stizzar fieu manchia en cas d'in incendi da guaud. Plinavant èn las quantitads d'accumulaziun da 250 m³ memia pitschnas per in'autra u in'ulteriura utilisaziun.

Tar la dumonda 5: En il rom d'in project da pilot che fa part dal project «Agricoltura neutrala al clima» vegnan actualmain examinads la realisabladad e l'effect da pitschens lais da retenziun. Ultra da quai duain vegnir eruidas – en il rom da la realisaziun dal punct central da svilup 7.2 dal Program da la Regenza 2025–2028 – las pussaivladads per in management integral da l'aua, vul dir in management che coordinescha las differentas pretensiuns envers las auas en ils intschess. En quest connex pon er lais d'accumulaziun pitschens esser d'impurtanza. Là pon ins natiralmain er examinar, sch'i dat potenzials per in'accumulaziun d'energia decentrala.



En num da la Regenza

Il president:

Marcus Caduff

Il cancellier:

Daniel Spadin